


崔清獻公集



崔清獻公集

崔與之撰

王雲五主編

叢書集成初編

崔清獻公集

中華民國二十六年六月初版

撰者 崔 與 之

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

崔清獻公集卷一

宋 增城崔與之正子撰

奏劄一

第三次辭免祕書少監 嘉定十年

朝散郎新除祕書少監崔某狀。昨準恩命。除祕書少監。控辭不獲。祇命而行。途中遇觸風寒。宿疾大作。輒上丐祠之請。伏準省劄。備奉聖旨。不允。依已降指揮。疾速前來供職。舟行聞命。臨深益危。伏念某碌碌州縣庸材耳。低飛逐食。若將終身。頃自朝廷更化之初。開明公道。收拾滯材。凡抱寸長。皆得自見。某誤蒙蒐獵。猥備驅馳。方擁州麾。便持憲節。入登郎省。出領帥藩。引之深淵之中。置之層霄之上。偏方寒土。遭遇明時。前此所未有也。惟是乘邊滋久。用力徒勤。計治罔功。黜幽有典。忽拜清除之目。晉陪中祕之游。雖公朝以其病而優之。豈庸流所敢夢而到此。蓋名者造物之所甚惜。得之非據。鬼神害盈。疢疾相陵。視昔尤甚。帝鄉在望。引足千鈞。歸心動搖。萬想俱息。亟上祈閒之請。泝江而西。舟行以風爲程。望日寢邈。繼承明命。復聞俞音。仰窺寬大之仁。未有棄捐之意。停權江潯。趑趄且行。感厚恩勉強而欲前。策病骨虺隤而莫進。不免披露性款。籲天哀鳴。期得請而後已。某非不知瀆尊有罪。方命有誅。輒以螻蟻之賤。疊犯雷霆之威。茲豈得已。欲望朝廷察此孤危之惻。檢照前申。特賜敷奏。畀以真祠。庶幾歲月之小休。實獲乾坤之大造。

他時應有繁難委使。誓當一死以報萬分。除已扶病迺邁。取道江西度嶺而歸。聽候從欲之命。疊冒威嚴。罪不容貸。奉聖旨。依屢降指揮。不允。仍疾速前來供職。

辭免兼國史檢討官

嘉定十年

朝散郎新除祕書少監崔某狀。三上丐祠之請。奉聖旨。依屢降指揮。不允。仍疾速前來供職。續準省劄。備奉聖旨。李大東兼詳定敕令官。崔與之兼國史院編修官。兼實錄院檢討官。恩出殊常。驚心汗背。某竊惟君命至重。出必惟行。臣之事君。生死惟命。此古今不易之大義也。避事者或欺僞以自便。要譽者或矯激以爲高。方命之誅。誠不容貸。至如抱病已甚。陳力莫勝。進無益於絲毫。退尙沾於升斗。則情可憫。罪可寬也。伏念某奔走萬里。辛苦一生。適值明時。猥玷清選。顧惟羣玉之府。世之耆儒碩學。筵武其間者。能幾人。椎然不文。躡有此幸。非特一身之寵。抑爲五嶺之光。自非衰疾出於大不獲已。何至棄榮而取辱。捨貴顯而就困窮。真切之情。昭然可見。所以喋喋控陳。凜凜俟譴。不謂俞音竟闕。異數還來。擢貳道山。辭至三而未獲。贅員史局。俾共二以奚堪。蟲負益危。鵜梁有媿。蓋求去而得進。與辭少而受多。於義皆不安。進退愈難。如臨淵谷。某自度纖冗。不敢更瀆威嚴。仰煩誅斥。除已恭稟。屢降供職指揮。一面扶憊起發前去。庶見衰殘之狀。乞加審察之公。所有續降兼職恩命。欲望朝廷特賜敷奏。收回成渙。庶安愚分。奉聖旨。不允。仍疾速前來供職。

辭免祕書少監乞赴宣幕

嘉定十年

朝散郎新除祕書少監兼國史院編修官兼實錄院檢討官崔某狀。昨已分關終更召擢。自顧衰病。有玷恩榮。請祠至三。已決歸計。天高聽邈。未賜矜從。君命有嚴。豈敢違戾。只得遵稟。回棹而前。舟次池口。忽覩本州進奏官報狀。某蒙江淮宣撫使辟充參謀官。雖曰未有被受。然已報行。今欲遵照屢降指揮。徑詣闕庭。緣上件辟命。已有所聞。若冒然而前。卽是辭勞而就逸。避煩使而覬清游。於心實不遑安。蓋緣除命在前。辟命在後。只合申審。乞免造朝。徑自赴幕。又恐伺候回降。必是遲延。今來殘虜寇邊。義當體國。豈容踟躕其行。雖風雨未霽。今已一面順流東下。徑趨京口。聽候指揮。遵守施行。準省劄勘會。已降指揮同知樞密院事曾某。已除參知政事。劄付新除祕書少監。遵依元降指揮。疾速前來供職。仍具知稟起發狀。申樞密院尙書省。

祕書少監乞補外

嘉定十年

朝請郎祕書少監崔某狀。作者久戍罔功。僥倖善罷。自知無用於世。決意南歸。三請弗從。幡然祇命。庶見凋殘之狀。必蒙矜憫之私。敢圖誤恩。俾塵清綴。叨榮踰分。福謝災生。頭風之疾已深。時復眩絕。每遇朝參月分。常有顛沛之虞。妄意欲求南中一郡。以爲歸計。自顧衰謝無能。固不足以任劇。若爲朝廷牧養細民。或可勉強爲之。伏念某守邊五年。服勤萬狀。及茲末路。困悴自憐。南州事簡民淳。得少休息。是亦閔勞均逸之意。欲望朝廷特賜敷奏。畀以南中家便州郡差遣。用榮其歸。實出天地生全大賜。奉聖旨不允。

辭免除祕書監

嘉定十年

朝請郎、試祕書少監崔某狀。伏準省劄，奉聖旨：崔與之除祕書監，程倬除祕書少監。內有兼職人依舊某自天開命，無地措身，伏念某孤立疇依，冥行自信，少負桑蓬之志，徒有壯懷，晚爲稻粱之謀，寧無媿色。茲解雲中之戍，忽塵天上之班，恩重難酬，器盈易覆，俗眼方窺於藏室，孱軀已入於病坊，求小壘以便私，屢布山中之款，晉大蓬而增寵，返登最上之顛，在儒生可謂至榮。豈陳人所宜冒處，而況一身如寄，百恙相陵，儻貪戀於目前，必狼狽於日後。伏望朝廷檢照，累申事理，特賜敷奏，改畀家便，州郡差遣，以保全其末路，實出大造生成之賜。所有省劄，未敢祇拜。奉聖旨：不允。

再辭免除祕書監

嘉定十年

朝請郎、試祕書少監崔某狀。昨具辭免祕書監除命，伏準省劄，奉聖旨：不允。某恭承訓飭，倍切凌兢，自度纖微，安敢煩瀆，而理有未安，情有未孚，不免冒昧控陳。竊惟漢以蓬山萃四方之名流，唐以瀛州極一時之妙選，當世以爲盛事。後人又爲美談，逮我國朝，尤重茲選，自非邃學異才，清修雅望，豈容濫廁其間。是以人才輩出，前後相望，實爲他時峻用之儲。某昨被殊恩，俾塵少列，辭避弗獲，循省自危，猶曰：管領英游，有長在焉。今大蓬之席旣虛，宜得鴻碩之彥，爲斯文重。豈伊庸陋，有此倖踰。清朝以其病而優之，諸儒問何來而至此，得之非據，凜不自勝。儻或冒居，祇自速戾，亦緣某分量盈滿，衰病侵陵，所患頭風已成，不治之疾，日來又苦脾泄，醫療月餘，尙未平愈，飲食全減，肌肉頓銷，日夕懷歸，但作首邱之想而已。輒犯嚴誅，洊仲危懇，欲望朝廷閱其凋瘵之狀，察其真切之情，檢照前申，特賜敷奏，曲從丐外之請，以全其末路。則

生成之賜大矣。所有省劄未敢祇拜。奉聖旨依已降指揮不允。

辭免除兼太子侍講

嘉定十年

朝請郎、試祕書監崔某狀。伏準省劄。備奉聖旨。崔與之兼太子侍講。聞命自天。措躬無地。竊以三代仁而且久。皆由教法之明。一時賢而有才。方預儲僚之選。治平中如陳薦、孫固。尙不符於衆望。紹興間惟范仲朱震斯可副於眷懷。顧如勸講之員。尤爲進德之助。伏念某性資愚陋。學術荒疎。西崑方媿於首登。東禁又叨於末屬。曾無一之足取。俾共二以奚堪。況秉德溫文。已著星輝之象。而執經啓迪。要宏日就之功。某惟何人。冒居此職。儻或乖於辭受。恐難免於曠瘼。欲望朝廷特賜敷奏。收回成渙。改畀名流。庶允穆於師言。以少安於愚分。所有恩命未敢祇拜。奉聖旨不允。

辭免除工部侍郎兼同修國史兼實錄院同修撰

嘉定十年

朝請郎、試祕書監、兼太子侍講崔某狀。伏準省劄。奉聖旨宣旨。除吏部侍郎。余應符除給事中。崔與之除工部侍郎。並日下供職。續奉聖旨。崔與之陞兼同修國史。兼實錄院同修撰。陟道山之長。除墨尙新。貳起部之卿。絲綸復下。叨榮踰分。履薄驚心。竊惟冬官事簡而職清。天子眷隆而選重。五材是飭。不徒技巧工匠之咸精。九門旣通。要在獻納論思而有益。茲爲顯擢。宜得名流。伏念某奮自遐方。瑩然孤進。寸長無取。不過碌碌州縣之才。多病相深。但作栩栩田園之夢。不圖末路。有玷清班。誤恩深媿於便藩。投老力求於閑散。忽晉大蓬之峻。復從少海之游。陞亞藝官。俾聯法從。曾未數旬之頃。疊此三命之榮。念時事方殷。惟

備械修車以爲急務。而帝簡有在。豈簪筆持橐以爲美觀。況史才自古爲難。雖宿學有詞莫措。茲聖經方襲六以爲七。非陋儒可共二而兼三。反覆以思。凌兢而懼。欲望朝廷敷奏。收回成命。改畀時髦。俾得遂於歸心。庶少安于愚分。所有恩命。未敢祇拜。奉聖旨不允。

辭免除煥章閣待制知成都府本路安撫使

嘉定十年

朝請郎權尙書工部侍郎兼同修國史兼實錄院同修撰崔與之奏。伏準省劄。奉聖旨。崔與之除煥章閣待制。知成都府本路安撫使。填見闕。臣聞命自天。驚心汗背。伏念臣碌碌州縣庸才爾。奔走四方。未嘗擇地。以勤掩拙。實倍其勞。致蒲柳之易凋。桑榆之浸晚。加以多病。日就衰殘。丐閑使私。欲全晚節。不謂非常之寵。濫及無聞之人。起部陞班。禁塗接武。平時敢作此夢耶。方此凌兢。莫知所措。益部謀帥。弄印久之。復俾庸虛。濫膺其選。以清廟候對之職。光賁其行。誤恩便落。竄爲異數。力綿任重。殆將壓焉。蜀居江漢上游。而成都實爲根本重地。必碩德雅望。而後可以鎮服人心。必遠識長材。而後可以應酬事變。一道蕃宣之寄。全在得人。承平無事。猶重所遷。厥今邊聲未寂。時事方殷。其可嘗試之乎。況天下之事。要須中外相應。大小相維。而後有濟。蓋中外當如一家。貧富休戚實同其責。而勢不可不相屬也。大小當如一體。疾痛癢皆切於身。而情不可不相孚也。臣一介奇窮。過蒙獎拔。東西惟命。其敢辭難。義所當爲。死且弗顧。但恐蜉蟻無援。孤立於萬里外。設或中外勢不相屬。大小情不相孚。或致誤事。一身獲戾。何足深計。而事體關繫。利害非輕。儻辭避之。或稽。必顛隕之立見。欲望聖慈。察其真實之惻。收回成渙。改畀長才。俾臣退奉真

祠獲全末路實出洪造生全之大賜。奉聖旨不允。

辭免除四川制置使

嘉定五年

朝請郎煥章閣待制知成都府本路安撫使暫權四川宣撫司職事崔與之狀奏臣猥以衰遲誤蒙簡拔俾專益郡牧民之寄黽勉服役一載而羸力鈍事叢絲髮無補方圖旦夕上祈閑之請適宣闡虛次以印來歸不免從權收管以安人心以俟朝命繼準聖旨指揮令臣暫權宣府職事君門萬里控避無從緣時暫攝職不敢煩褻有請茲承誤恩畀以制垣之重寄加之延閣之隆名揣分非宜捫膺自懼厥今時事孔棘邊聲未寧剝肉成瘡有根本先撥之慮張頤待哺有樵蘇後爨之憂況二虜之相持正三邊之交急勢成危證命繫良醫豈繫不根之蹤可任于蕃之責欲望聖慈俯憐真惻收回成渙改畀名流俾臣仍舊時暫權宣撫司職事聽候差除正官施行庶幾仰寬顧憂下安愚分所有恩命未敢祇拜。奉聖旨不允。

四川制置乞祠

嘉定六年

煥章閣直學士朝散大夫成都潼川府夔州利州路安撫制置使兼知成都軍府崔與之狀奏臣嶺海寒士遭值昌明更化十有六年之間擢從冗散躡升禁塗恩數便蕃眷簡隆厚銘膚鏤骨誓效糜捐昨自被命入蜀誰不以上下和衷爲難臣亦以爲難而義不容辭也再命護蜀誰不以表裏壤證爲憂臣亦以爲憂而義不容辭也君命有嚴冒茲遠役三邊責重四路事繁自顧衰遲了無能解惟有一誠體國恃天而行外而二三蚌鷸之相持上賴國威邊聲稍息內而十萬貔貅之待哺仰憑天意歲事薦登而況聖度寬

洪有求斯答。廟謨堅定。可守而行。覆燾所加。譴訶未及。方圖末路。益勵初心。緣臣蒲柳之姿。一生勞苦。老而易衰。福過災生。百病交作。近來頭風發動。甚於常時。呻吟叫號。痛刺如破。加以心忡健忘。肌肉盡銷。殘息如絲。旦暮人耳。臣非不知委身報國。臣子職分。而邊閭重寄。安危所關。萬里奔馳。一生勞勩。綿力窮而不可強。倖事多而不可常。況抱病已深。恐誤國事。伏望聖慈。憐其久戍。察其危衷。亟選長材。來爲臣代賦。臣祠廩俾待終於衡茅。實出天地始終生全之賜。奉聖旨不允。令學士院降詔。

辭免召赴行在

嘉定十年

六月十一日。三省同奉聖旨。崔與之召赴行在。其四川安撫制置。命鄒孟卿時暫權。續申鄒孟卿致仕。奉聖旨。崔與之候有四川制置使正官到日。起發赴行在。奉聖旨。鄭損除寶謨閣待制。四川制置使兼知成都府。填見闕。崔與之候正官到日。起發赴行在。自天開命。無地容身。伏念臣老矣一行。淒其萬狀。惟知盡瘁。不敢辭勞。方泝峽建西州之牙。復度劍守北門之鑰。風霜刮面。歲月壓頭。以衰朽垂盡之年。得殘廢不治之疾。老而懷土。窮則呼天。飛章丐閑。蒙恩賜召。朝廷未有棄捐舊物之意。臣子豈無貪戀明時之心。百恙相陵。一衰不貸。頭欲破而掣痛不已。心如啄而健忘尤深。氣體支離。精神昏憤。年事既去。世念已灰。亟尋清都香火之緣。敢作禁街鐘鼓之夢。惟求趣代。早遂生還。伏望聖慈。憫臣久勞。憐臣久病。鑒此由衷之請。俾之奉祠而歸。春水未漲。而出瞿塘。天氣未炎。而入庾嶺。庶幾末路。可畢餘生。悉出天地始終生全之大賜。奉聖旨。降詔不允。

崔清獻公集卷二

奏劄二

辭免禮部尙書

嘉定十七年

煥章閣直學士、朝請大夫、成都潼川府夔州利州路安撫制置兼知成都軍府崔與之狀奏。臣昨準省劄。坐奉聖旨。崔與之召赴行在。尋具辭免。伏蒙降詔不允。臣再具奏間。續准御前金字牌。遞到御寶封劄。子奉聖旨。崔與之除權禮部尙書。候正官到日交割。前來供職。臣聞命自天。措身無地。竊惟舜命秩宗。以典三禮。蓋取僉言。周建春官。以諧萬民。最號清選。凡屬亨嘉之運。必嚴禮樂之司。雖曰攝承。詎容輕受。伏念臣丹心體國。白首戍邊。捫參井以西馳。老懷猶壯。指褒斜而北戍。綿力易疲。屢引病以丐閑。忽蒙恩而賜召。方堅控避。遽玷褻除。鈞天九奏之音。夢寐不到。文昌六星之象。心目還驚。況無橫草之勞。復有採薪之疾。奄奄殘息。凜凜危衷。伏望聖慈。憐臣桑榆之景無多。察臣樗櫟之才焉用。收還成命。改賦真祠。俾首邱得遂於初心。庶末路可全於晚節。所有恩命。未敢祇受。奉聖旨不允。令學士院降詔。仍疾速前來供職。

再辭免禮部尙書

嘉定十七年

煥章閣直學士、朝請大夫、前四川安撫制置使崔某狀。昨辭免除權禮部尙書。乞改畀祠祿。繼準省劄。備奉聖旨不允。令學士院降詔。仍令疾速前來供職。聞命自天。凌兢失措。某旣衰且病。力丐真祠。宜黜而升。

忽叨顯擢。顧六官於禮爲重。而八座非賢莫居。被寵踰涯。捫膺增惕。巽辭雖切。俞命未頒。區區血誠。不免再有控請。伏念某孤陋寒儒。起身荒左。遭逢盛際。猥被使令。恩重感深。期於報稱。南航海表。東涉淮壖。西北戍於蜀口。苟可勉強。未嘗輒辭。屬以桑榆浸晚。蒲柳易凋。宿恙日深。百骸柴立。去夏一病。死而復生。雖殘息僅存。已成沉痾。歸田有請。急於投閑。天閔其勞。獲釋重荷。一旦生出三峽。已爲過幸。常伯清選。夢所不到。今若扶憊貪榮。必顛仆於道路。伏望朝廷察其危迫之情。特賜敷奏。賦以祠廩。俾待盡于衡茅。實出始終生全之大賜。奉聖旨。依已降詔不允。不得再有陳請。疾速前來供職。

第三次辭免除禮部尙書

嘉定七年

煥章閣直學士。朝請大夫。前四川安撫制置使崔某。護蜀罔功。僥倖滿替。伏準恩命。除禮部尙書。尋具辭免。丐祠而歸。續準降詔不允。六月初至岳州。再具辭免。八月半至靜江府。準省劄指揮三省同奉聖旨。依已降詔不允。不得再有陳請。仍疾速前來供職。聞命震惕。情迫於中。輒冒嚴誅。瀝血控請。竊惟君命召。不俟駕。於禮固所當然。有疾不能造朝。其情亦在所閔。伏念某天予甚嗇。夜行不休。入而奉筆橐於清廂。出則建牙幢於巨鎮。公朝謂其忠實有餘。而材力不逮。往往用其長而護其短。曲加容覆。未底譴訶。及其抱病危困。又爲除代。俾得生還。春官攝承。更叨清近之選。恩隆數異。前所未聞。感戴鴻私。若爲稱塞。自當仰體勒歸之意。策鈍而前。實緣某自壬申歲持嶺右憲節。半年行部。遍歷瘴鄉。因染風眩之疾。十有三年矣。病根日深。遂成沉廢。加以多事損心。健忘尤甚。怔忡自汗。通夕不交睫。或睡而覺。神不附體。恍然久之而

後定。此皆垂亡之證。某豈不知命出惟行。三瀆有罪。自非衰病大不獲已。其敢煩褻。徒自速辜。伏望朝廷念某平生勞苦之蹤。末路凋殘之狀。察其真切由衷之懇。特爲敷奏。畀以祠祿。實出生全之恩。奉聖旨。依屢降指揮。不得再有陳請。仍疾速前來供職。

第四次辭免禮部尙書

寶慶元年

煥章閣直學士。朝請大夫。前四川安撫制置使崔某狀。昨者第三次辭免權禮部尙書除命。伏準省劄。奉聖旨。依屢降指揮。不允。不得更有陳請。仍疾速前來供職。自天聞命。震懼于中。勢分有嚴。其敢屢瀆。某竊惟父母之命。人子固不可違。而人子有疾。父母亦復憂之。仰恃鴻造生育之恩。冒罪以請。伏念某西陲解戍。衰病相乘。暮鳥急於投林。纔出三峽。卽渡洞庭。泝瀟湘。取道桂林而歸。萬里修途。適值劇暑。逮入五嶺。秋令已深。正當嵐瘴之時。久客乍歸。易於衝感。宿恙爲梗。甚於前時。自顧弱植孤根。去鄉井十有三年。頽齡已邁。方幸生還。而臥病不能出門戶。趣行有命。扶憊莫前。自惟平生奔走四方。王事盡瘁。惟有一誠體國。至於神疲力竭而後已。未嘗輒辭。況春官最爲清近之選。血氣雖衰。豈無得心。而奄奄垂盡之餘。陳力有不容強。累具控辭。出於真實。不敢一語欺天。肺肝吐露已盡。高而弗聞。日夕懷懼。欲望朝廷稔念衰蹤。特爲敷奏。畀以祠祿。休養病軀。如或稍可支持。誓當糜捐圖報。不敢辭也。奉聖旨。依屢降指揮。不允。仍日下前來供職。具已發日申尙書省。

辭免除顯謨閣直學士知潭州湖南安撫使

寶慶元年

煥章閣直學士、中奉大夫、前四川安撫制置使崔與之狀奏。伏準省劄。奉聖旨。崔與之除顯謨閣直學士。知潭州湖南安撫使。填闕。令所在軍州差撥兵級三十人津發。疾速之任。候任滿前來奏事。恍承誤渥。深切驚心。歸班之命。屢辭。方茲俟譴。予郡之恩。繼下。復爾叨榮。雖大造曲成而不遺。顧小器已盈而自懼。伏念臣樸忠素守。艱阻備嘗。惟四方奔走。投老而不休。故百恙侵陵。乘虛而爲梗。五年守巴蜀。自知駑力之窮。六月泝瀟湘。已決狐邱之計。陛下嗣登大寶。勉思遠圖。勵精方新。進德不已。親近正人。以新聖學。招來名彥。以興治功。當此天日清明之初。誰無風雲依乘之志。況臣起身遐壤。荷國厚恩。先皇帝拔臣於冗散之中。徑躋清近。聖天子召臣於歸休之後。不容控辭。茲實意之上孚。忽溫言之下逮。長沙巨屏。猶付重權。延閣穹班。更陞華直。仰見公朝未忍棄捐之意。徒有末路不堪驅策之憂。緣臣暮景相催。宿病尤甚。秩宗事簡。尙不能一望於清光。連帥責叢。其何以仰當於隆委。自顧衰殘之狀。實深顛踣之虞。欲望聖慈。察臣愚惻。畀臣祠祿。俾養痾於田里。免速斃於道途。儻溝壑之未填。或涓埃之可報。所有省劄。未敢祇拜。奉聖旨。不允。令學士院降詔。

辭免知潭州湖南安撫使

寶慶元年

煥章閣直學士、中奉大夫、前四川安撫制置使崔某狀。昨準省劄。指揮崔某除顯謨閣直學士。知潭州湖南安撫使。尋具辭免。奉聖旨。不允。令學士院降詔。聞命自天。驚心汗背。某投老多病。屢申懇以丐祠。求退得遷。復蒙恩而予郡。叨榮非據。履薄自危。伏念某起自炎陬。蜉蟻無援。清朝拔士。取之疎冗。無聞之中。猥

玷使令寢階通顯。可謂遭逢之幸。粵從西戍。抱病支離。息影窮閭。庶便休養。不圖誤渥。下賁衰蹤。六卿峻除。方力辭而得請。九牧重任。俄寵數之還來。洪私倍費於生成。弱植豈勝其負荷。亟騰免牘。尙闕俞音。某自惟冉冉殘齡。駸駸謝事。一衰已甚。百病相乘。名曰頭風。積成奇證。每一發動。與死爲謀。加以心病日深。形骸柴立。十目所共見也。長沙據上流之雄。事任甚重。詎容久闕正官。欲望朝廷特賜敷奏。別選名流。以副隆委。載念某自去春益昌解印之後。將及二年。衰病無能爲役。而又未能忘祿。哀鳴屢矣。情詞已窮。併乞垂憐。畀以祠廩。抑亦見聖代始終保全老臣之意。奉聖旨。依已降詔不允。不得再有陳請。

再辭免知潭州湖南安撫使

寶慶二年

煥章閣直學士中奉大夫前四川安撫制置使崔某狀。昨準省劄。指揮除顯謨閣直學士。知潭州湖南安撫使。填見闕。卽具辭免。準降詔不允。尋再具辭免。奉聖旨。依已降詔不允。不得再有陳請。某聞命自天。不勝震懼。竊惟令出惟行。稽留有罪。亟當遵稟。其敢重違。而情迫于中。有不容自默者。伏念某碌碌庸才。屢膺煩使。鞠躬盡瘁。不敢告勞。淮蜀十年。技窮力屈。投老多病。僥倖終更。歸伏衡茅。庶便醫藥。公朝矜念舊物。寵數狎來。閫寄非輕。猥叨顯擢。自惟荷國厚恩。媿未有以補報。頭顱至此。而猶有未忍棄捐。可謂衰晚遭逢之幸。仰惟初政清明。求士如渴。何物冗陋。首玷榮除。恩重感深。若爲稱塞。自應驅馳而往。圖報萬分。而日暮虺隤。莫任鞭策。疊具辭免。尙未矜從。惟有凜凜自譴而已。嘗聞士大夫保初節易。保晚節難。方精力強盛之年。銳志事功。東西惟命而不辭。隨其所長。皆可展布。以自見及其老也。精力旣衰。非惟不足以

任事必至廢事且誤事也。國家以忠厚之意待士大夫，制爲祠宮之廩，庸示優恩。或老而丐歸，或病而求養，或久勞而欲均休，俾之少遂安閑，而又不失寸祿，以保全其末路，忠厚之至也。區區危惻，冒罪控陳，欲望朝廷察其情，信其言，檢會累申，特賜敷奏，曲從所欲，頂踵生全之恩大矣。奉聖旨，除寶謨閣學士，依所乞，提舉西京嵩山崇福宮，任便居住。

辭免除寶謨閣學士

寶慶二年

煥章閣直學士、中奉大夫、新除提舉西京嵩山崇福宮、增城縣開國伯、食邑九百戶、賜紫金魚袋崔與之狀奏，伏準省劄，奉聖旨，除寶謨閣學士，依所乞，提舉西京嵩山崇福宮，任便居住。臣均佚琳宮，忽被予祠之寵，陞華奎閣，更叨進職之榮，異數便蕃，危衷震惕，伏念臣受材庸下，遭時盛明，通籍九門，入簪清廟之邃，分符萬里，出臨巨屏之雄，計洽罔功，黜幽有典，荷公朝用其長而護其短，至末路憐其病而全其歸，陟之文昌六聯之峻班，繼以元戎十乘之重寄，恩加頂踵，感至涕洟，屬初政之方新，撫孤蹤而欲躍，驥雖老而伏櫪，尙欲加鞭，鶴已病而乘軒，何堪受甲，自嘆桑榆之景，但傾葵藿之心，未酬大恩，徒抱遺憾，輒布投閑之悃，深虞方命之誅，忱辭既孚，淵聽甚邇，簪履不遺於舊物，絲綸更侈於新除，祠官得請以爲榮，銘心知幸，學士爲真而非據，跼蹐難勝，儻辭受之或乖，則顛隲之立見，上件宮祠指揮，臣除已恭稟遙謝，祇受訖，所有寶謨閣學士恩命，未敢祇拜，欲望聖慈，收回誤恩，庶安愚分，實出天地始終大賜。奉聖旨，不允，令學士院降詔。